



U prisustvu visokih vojnih dužnosnika, predstavnika civilnih vlasti Bosne i Hercegovine, međunarodnih vojnih organizacija, vojno-diplomatskog kora i boračkih asocijacija, danas je u kasarni Dubrave upriličena centralna svečanost obilježavanja 27. godišnjice Armije Republike Bosne i Hercegovine (ARBiH) i 14. godišnjice formiranja Drugog pješadijskog puka Oružanih snaga naše zemlje.

Tom prilikom upućene su čestitke, ali i ukazano na značaj osnivanja Armije RBiH. Član Predsjedništva Bosne i Hercegovine Šefik Džaferović također je prisustvovao obilježavanju

ovog značajnog datuma, a prema njegovim riječima, Armija RBiH je jedina legalna vojna sila legalne i legitimne vlade naše zemlje.

Ona je, naveo je Džaferović, u nemogućim uvjetima branila i odbranila državu Bosnu i Hercegovinu.

“To je velika stvar i velika razlika u odnosu na sve druge vojske koje su dolazile i harale Bosnom i Hercegovinom, pokušavajući da je unište”, naglasio je član Predsjedništva BiH.

### **Armija nastala iz naroda**

Armija RBiH je nastala iz naroda, u trenutku koji je bio najteži u historiji BiH, kada su brojne sile pokušavale da unište našu zemlju.

“Nastavši iz naroda, odnosno od onih ljudi koji vole ovu zemlju, ona je odbranila BiH i omogućila zaključivanje Daytonskog mirovnog sporazuma. Danas se posebno sjećamo onih koji su najzaslužniji za slobodu u kojoj danas živimo, bosanskih šehida, pripadnika poginulih boraca, ratnih vojnih invalida i demobilisanih boraca”, nastavio je Džaferović.

Danas, 24 godine nakon Daytonskog mirovnog sporazuma Džaferović smatra da se treba nastaviti u onome smjeru za koji se borila Armija RBiH, odnosno u očuvanju cjelovite i demokratske BiH, koja je država ravnopravnih naroda, građana i ljudi, bez obzira u kojem dijelu naše zemlje živjeli.

“Taj cilj ćemo ostvariti, a moja poruka retrogradnim snagama, koje bi danas u miru da realiziraju neke svoje ciljeve koje ni ratom nisu mogle ostvariti, jeste da se okane svega toga. BiH se odbranila i opstala u mnogo težim uvjetima, u situaciji kada su oni koji su atakovali na nju bili mnogo snažniji. Danas je BiH mnogo snažnija, a oni koji su atakovali od 1992. do 1995. sada su mnogo slabiji”, potcrtao je Džaferović.

### **Potrebno prenositi istinu**

Zamjenik ministricе odbrane Marine Pendeš Sead Jusić smatra da je 15. april od velikog značaja u bh. historiji.

“Zahvaljujući današnjem datumu i odlukama koje su donesene 8. i 9. aprila, te zaokruženoj vojnoj sili, danas svi Bosanci i Hercegovci mogu reći da imaju državu i državljanstvo od svoje domovine. Ljudima je veoma važno da u istom imaju domovinu, državu i državljanstvo”, dodao

je Jusić.

Federalni ministar za pitanja boraca Salko Bukvarević stava je da 15. april treba obilježavati, ali i prenositi istinu o odbrani BiH.

“Danas je možda i najviše napadnuta istina o toj odbrani. Isti oni agresori koji su izvršili agresiju na BiH danas vrše agresiju na istinu. Zbog toga je naša trajna zadaća da obilježavamo značajne datume te da se brinemo o svim stradalnicima, prije svega o porodicama šehida i poginulih boraca, ratnim vojnim invalidima, ali i o veteranima rata koji su danas u situaciji da ih je sustigla starost ili bolest, a nemaju od čega da žive”, poručio je Bukvarević.

U okviru obilježavanja 27. godišnjice Armije RBiH i 14. godišnjice formiranja Drugog pješadijskog puka Oružanih snaga naše zemlje u kasarni Dubrave upriličen je i prigodan kulturno-zabavni program.

[Klix.ba/sda.ba](http://Klix.ba/sda.ba)